



Neqerooruteqartitsinissamut eqqarsaataavoq, aningaasat atorlugit annertunerusumik pissarsiaqartitsisinnaasumik unammilleqatigiinnerup annertunerulersinnissaa.

Kiffartuunneqarnissamut isumaqatigiissutit maannakkut atuuttut, ikittuinnaat pinnatik, isumaqatigiissutit 2006-imi isumaqatigiissutigineqartunik sivitsuinerupput. Ukiut ingerlaneranni Namminersorlutik Oqartussat periaatsimi naapertuutinngitsunik arlalinnik paasisaqarput. Siunissami pitsaanerpaanik angusaqarnissarput qulakkeerniarlugu ilaatigut kommunit aamma inuussutissarsiortut, najukkani kissaatigineqartunik annertuumik malugisimannittuusut Namminersorlutik Oqartussat maannakkut qanimut oqaloqatigineqarput.

Neqerooruteqartitsinermi ataatsimut isigalugu pitsaanerpaamik angallanermik pilersitsinissamut eqaannerulersitsinissaq aamma periarfissanik atorluaanissaq aallunneqarput. Ilaatigut siunertamut naapertuuppat aammalu aningaasaqarnikkut sinaakktissat iluanniitinneqarsinnaalluni, assartuussisarnerup marlunnik aallaaveqartup atuutsinneqalernissaanut periarfissat misissorneqarput.

Taamaattorli ersarippoq ammasumik neqerooruteqartitsinermi qanoq annertutigisumik iluanaaruteqarsinnaaneq killeqartoq. Tunngaviusumik nunatta isorartoorsummat innuttaasullu siamasissumi nunassissimallutik, unammilligassaqaartuaannartussaavugut. Taamaattumik Naalackersuisut kiffartuunneqarnissamut isumaqatigiissutit atorlugit assartuussinerup akikinnerulersinneqarnissaa kisiat siunnerfiginngilaat, kisiannili aamma attaveqarnermi ungasissumut aningaasaliisarnissap aammalu unammilleqatigiinnerup nukittorsarneqarnissaata qulakkeerneqarnissai siunnerfigalugit. Naalackersuisut tamatuma saniatigut naatsorsuutigaat, ingerlatseqatigiiffiit Namminersorlutik Oqartussanit pigineqartut, allaffissornermut ingerlatsinermullu aningaasartuutit sukannersumik aqutsinermikkut, akisussaaffimminnik kivitsissasut.